

**Umat Islam Di Malaysia Perlu Ambil Iktibar Kesukaran Umat – Muhyiddin Bernama
14 Ogos, 2012**

MUAR, 14 Ogos (Bernama) -- Timbalan Perdana Menteri Tan Sri Muhyiddin Yassin berkata umat Islam di negara ini perlu mengambil iktibar daripada kesukaran dan kesulitan yang dialami oleh negara Islam lain di dunia.

Beliau berkata walaupun masih ada umat Islam di negara ini yang hidup dalam serba kekurangan, ia tidak seteruk apa yang berlaku pada umat Islam di sesetengah negara Islam.

"Kita tengok banyak tempat di negara kita dalam bulan puasa ini mengagih bubur lambuk, nasi dan makanan percuma sedangkan di sesetengah negara Islam di dunia (mereka) hidup dengan sengsara sekali.

"Walaupun ada yang hidup dalam kekurangan, namun ia tidak seteruk, tidak perit dan sesengsara seperti apa yang dialami oleh mereka. Jadi kita harus bersyukur dengan keadaan itu dan Malaysia di bawah kerajaan Barisan Nasional sentiasa berusaha mengurangkan bebanan rakyat dari masa ke semasa," katanya.

Beliau berkata demikian ketika berucap pada majlis berbuka puasa dan penyampaian zakat Uda Holding Berhad oleh Pengarah Urusannya Ahmad Abu Bakar di Surau Saadiah di sini.

Muhyiddin berkata kerajaan yang dipimpin Perdana Menteri Datuk Seri Najib Tun Razak juga sentiasa memikirkan cara terbaik untuk mengembangkan ekonomi negara.

Pada majlis itu timbalan perdana menteri turut menyampaikan bantuan kepada 99 orang fakir.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=688143>